


San Andres, apostolua



Andres apostoluaren ERESERKIA

1

Jesusen deia entzun zendunean
zure bihotza fedez bete zan,
langailuak itxita bazterrean
giza arrantzale bihurtu zinan
Jesus Jaunak esandako bidean
bizi poza aurkitu zenduan (bir)

2

Ander, gaur gatoz zugana
kantari
ospatu nahirik zure eguna
zuretzat maisu izan zan
Jaunari
eskatu gu danon batasuna
bizi dagigun leial ta
pozgarri
Kristok esandako barri ona
(bir)

3

Alkartasun, bake eta egia
lagun gagizuz gurean lortzen
zure antzera apostolu
herria
izatean alaitu gaitezen
zure bitartez, apostolu
handia,
gure bizitzak poztu
daitezen (bir)

Sarrera-oharra

Senideok: Andres apostoluaren liturgia ospatzeko alkatu gara baseliza honetan. Jesusek lehenengo deitua dogu Andres (**Protokletos** deitzen deutsoe horregaitik), eta honek bere anaia Simon erakarri eban Jesusengana.

Ortodoxoek Andresen ondorengoak dirala uste dabe; Katolikook Pedroren ondorengoak; eta zatituta gagoz.

Gure gurasoek kristinauak zirala/dirala..., baina seme-alabak sinismenetik aldenduta, gehienbat.

Zer deritzazue gaurko otoitzean hurrengo hiru eskariok

egiteari?

- 1 Gure sinismena indartu eta gaurkotu deigula;
- 2 Kristau eleizak alkartu daitezala;
- 3 Gure ondorengoek sinismena besarkatu daiela.

Andres apostolua izango dogu eredu eta gidari.

Sarrera-abestia

Zein gozo ta eder dan anaiok alkartu
eta danok batera Jainkoa goratu.

—Gora bihotzak eta guztiok egin kantu:
Jainkoak bere eskuz salbatuko gaitu.

—Zabal gogoak Jaunaren Hitza entzuteko;
haren nahia jakinik zuzen ibilteko.

Irakurgaiari sarrerea (*Erm* 10, 9-18)

Begira zelango garrantzia dauan Jesus ezagutzeak eta
haren barri inguruan iragarteak: salbamen iturri da.

*Mezutik dator sinistea,
eta Kristoren barri emotea da mezua.*

San Paulo Apostoluak Erromatarrei egindako epistolatik

Senideok: Zeure ahoz autortzen badozu Jesus Jauna dala, eta zeure bihotzean sinisten badozu Jainkoak hilen artetik biztu ebala, salbatuko zara. Izan be bihotzez sinisten dauana zuzentzat hartzen dau-eta Jainkoak, eta ahoz autortzen dauana salbatu egiten da. Liburu Santuak dino: «Harengan sinisten dauana ez da lotsagarri izango».

Judegu izan ala ez, ez dago bereizketarik, bat bera da-eta guztien Jauna, dei egiten deutsoen guztientzat eskuzabala. Izan be, «Jaunaren izenari dei egiten deutsona salbatuko da».

Zelan, oster, dei egin, harengan sinisten ez badabe? Zelan sinistu, haren entzuterik ez badabe? Zelan entzun,

nork iragarrik ez bada? Zelan iragarri, haretarako bialdurik ez bada? Liburu Santuak dinoan lez: «Bai ederrak barri onak ekartzen dabezanen oinak!» Ez deutsoe, oster, danek harrera ona egin Barri Onari. Isaiasek dino: «Jauna, nork sinistu dau gure mezua?» Beraz, mezutik dator sinistea, eta Kristoren barri emotea da mezua.

Eta nik itauntzen dot: «Ez ete dabe entzun?» Bai, horixe: «Lurbira guztira zabaldu da hareen berbea, munduaren bazterreraino hareen mezua».

Jaunak esana.

Erantzun salmoa

Gauza ederrak ez dira gordeta euki eta norbere atseginerako; hareen barri emon eta guztien zorionerako baino. Ikasi daigun Izaditik.

R/. Lurbira guztira zabaltzen da hareen ahotsa.

Zeruek Jainkoaren aintza dabe kontatzen,
ortziak haren eskuen lana iragartzen.
Egunak egunari luzatzen deutso mezua,
gauak gauari jakinarazoten. R/.

Berbotsik eta hitzik barik,
entzun ezinezkoa da hareen ahotsa.
Lurbira guztira zabaltzen da hareen hotsa,
munduaren bazterreraino hareen hizkera. R/.

Ebanjelioari sarrerea (Mt 4, 18-22)

Jesusek erreinua iragarten dihardu, eta, lehen gauza lez, lanean diharduenei egingo deutse dei, talde bat osotzeko eta bialduak izateko. **Aleluia** abestuz egin deiogun harrerea, zutunik.

HERRI-OTOITZA (Eskariak)

Eleiz taldea eratzeko eta Erreinua iragarteko dei egiten deuskun Jaunagaz aurkeztu deioguzan eskariak Jainko Aitari:

—Eleizearen alde: bere lehentasuna Erreinuaren iragarpena izan daiten, pobreekin, bazterreratuekin eta ezereztuekin alkartasuna erakutsiz, *eskatzen deutsugu, Jauna*. ZEUGAN DOGU USTE ONA.

—Gorrotoa eta alkar ikusezina nagusi diran lurraldeetan parkamena eta bakea erditzen ikusi daigun, *eskatzen deutsugu, Jauna*.

—Etorkinek gure lurraldeetan ateak zabalik aurkitu daiezan, eta behar daben laguntza eskuratu, *eskatzen deutsugu, Jauna*.

—Eukaristiarako alkartu garanok, esker oneko erantzuna emon deiogun dei egiten deuskun Jesus Jaunari, eleiz alkartea gaurkotzen ahaleginduz, *eskatzen deutsugu, Jauna*.

Gure eskariak onartzen dozuzan Jainko ona: somau zaiguzala geure ondoan, adore-emoile, eskatua gauzatu ahal izateko. Jesu Kristo gure Jaunaren bitartez.

—Amen.

Jaunartzean

Jesus maitea zan azken Afarian
bera emon nahirik ardao ta ogian.
Guretzat zalarik hilteko aurrean
maitasunak eukan bihotza menpean.

**Gurtu daigun beti Jesus Jainko Jauna,
sakramentu honetan gurekin dagoena.**

Apostoluei minez esan deutse:

«Ni gaur saldua naiz, bihar hilgo nabe.
Aitarenganako denpora jat bete,
hona orain zenbat zaituedan maite.»

**Gurtu daigun beti Jesus Jainko Jauna,
sakramentu honetan gurekin dagoena.**

Azken oharra

Adore eta indar barrituekaz urten geike eleizkizun honetatik. Eta badaukagu zer eginik: Jesusek bere autorle izatera bialtzen gaitu, batasunean jokatzera eta alkar maitatzera. Ez deiogun huts egin. Bilatu daigun eleizgintzan esku hartzea eta pobre eta bazterrerauekaz alkartasuna erakustea.

Alkartuta goazen, aurrera kantari
bideak zabalduz betiko pozari.